

Այստեղ վերջանում է Թովմայի կեանքի առաջին շրջանը, երբ նա մօտաւորապէս 25 տարի շարունակ վանքից վանք էր անցնում, մի վարդապետից միւսին, ժամանակի հասկացողութեամբ գիտնական կամ վարդապետական կատարելութեան հասնելու Մենք տեսանք մասամբ, թէ ճրտեղ ինչ էր սովորել մօտաւորապէս: Բայց Կիրակոս բանասէրը ընդհանուր խօսքերով իւր վարդապետին «մի՞ լարժապետ», «միառաւորեալ րարունի», «խորիմաց հոետոր», «համանման փիլիսոփային (Դաւթի)», ընորոշելուց յետոյ՝ թուում է և նորա ուսած կամ ձեռք բերած գիտութիւնները, այն է, արտաքին փիլիսոփայութեան հօթ գրքերը, «որ է Քերականն, Սահմանքն, Պորփիրն, Ստորոգութիւնքն Արիստոտելին, Պերիարմենիասն, Աշխարհացն, Առաքինութեանցն, և զհին և զնոր կտակարանացն աստուածեղէն տառիցն Հ և Բ գրոց, Ծ նուրբ գրոց... ԾԱ վիպասական պատմագիրք»*: Մեր միջնադարեան վարդապետարանների ծրագիրն էր այս, որի մասին աւելի մանրամասնութիւններ ունինք ձեռագիրների մէջ, «Արտաքին գրեանքն որ ի դ՝ մտանէն այս են» վերնագրով: Բացի վերոյիշեալ հօթ իմաստասիրական գրքերից, այդ ցուցակի մէջ են մտնում Նիւսացու, Աստուածաբանի, Բարսղի, Փիլոնի, Դիոնեսիոս Արիսպագացու անուան հետ կապուած որոշ գրքեր, որոնք «Նրբեր» կամ «Նուրբ գրեանք» էին կոչուում. Հին և Նոր կտակարանի «ԺԸ. մեկնիչ», իննը հին և իննը նոր կտակարանից**:

Ի հարկէ, պէտք չէ կարծել, որպէս թէ այս բոլոր գրքերն ու գիտութիւնները Թովման ուսումնասիրել է իւր կեանքի առաջին կամ աշակերտութեան շրջանում: Մի մասը նա կարող էր յետոյ ուսումնասիրած լինել. յատկապէս Կիրակոսի շեշտած հմտութիւնը ձեռք է բերել նա վարդապետական աստիճան ստանալուց յետոյ, բայց թուած գրքերի և գիտութիւնների մեծագոյն մասին նա ծանօթ էր արդէն ուսանողութեան շրջանից: Այս հանգամանքը հարկ համարեցինք փոքր ինչ աւելի պարզել՝ ոչ միայն Թովմայի գիտութեան մասին գաղափար տալու նպատակով, այլ և թէ առաջնակարգ վարդապետները ինչպիսի՞ պատրաստութիւն էին սպասում իրենց աշակերտներից, նրանց աստիճան կամ գաւազան տալու համար: Բացի դրանից ընծայացուն պէտք է բերան անէր «զգիրս ասացուածոց վարդապետական կարգի», այսպէս էր գոնէ Դրիգոր Տաթևացու վերաբերութեամբ***, երբ նա Որոտնեցու հրամանով պատրաստուում էր վարդապետական գաւազան ստանալու:

* Նոր Նիւթեր. Ար. 758. (1).

** Ձեռ. Ա. Էջմ. № 2290/2490. 124ր. Համեմ. Նորրբ գրքերի մասին. Арх. Месропъ Теръ-Мовсисянъ. Переводъ Библии. СП. 1902. 6ր. 104—105:

*** Մեծոփ. Պատմ. Լանկ. 36.